

大方廣佛華嚴經普賢行願品別行疏鈔卷第十

唐圭峯草堂寺沙門宗密隨疏鈔

△疏第七請佛住世三一牒名。

經復次善男子言請佛住世者。

△疏卽是勸請中別義。

鈔偈云十方一切佛。若欲捨壽命。我今頭面禮。勸

請令久住。釋曰。眾生心淨見佛常住。眾生心垢見

佛捨命。佛無生滅。隨機見殊。故知心淨觀佛。佛則

常住爲真勸也。

△疏二釋相。

經所有盡法界虛空界十方三世一切佛刹極微塵
數諸佛如來將欲示現般涅槃者及諸菩薩聲聞緣
覺有學無學乃至一切諸善知識我悉勸請莫入涅
槃經於一切佛刹極微塵數劫為欲利樂一切眾生

鈔初別標如來中先釋涅槃後明示般言涅槃者
具云般涅槃那古譯為入滅息息即是滅故但云
入滅或云滅度即滅障度苦也準涅槃疏中滅義
有四一事滅二德滅三應滅四理滅言事滅者事
謂生死因果事相滅生死故名為事滅言德滅者
此有其二一若以緣修名德至果捨修名為德滅

滅彼緣修故二真德為德即無性可取無相可捨
以佛真德離性相故言應滅者隨化世間示滅有
因現亡身智以應盡還源名為應滅言理滅者此
亦有二一是相空安相諸法空無有實安心所取
體相俱無二是真空如來藏中恆沙佛法離相離
性名之為空此體有相無真即不空空即不有不
空不有即是涅槃總名理滅滅義雖眾要唯此四
四滅之中理滅為本由見相空成前事滅由見真
空成前德滅依體起用便有應滅由此理滅具二
種空故以理滅為三滅本具四滅故名為涅槃廣

如彼說。新云。波利匿嚩喃。翻為圓寂。謂義充法界。德備塵沙。故稱圓體。窮真性。妙絕相累。故云寂。又法爾無缺。故稱圓體。自真常。故稱寂。此約性淨。又萬德成滿。故稱圓。眾類永寂。故云寂。此約方便。又化用周普。故稱圓。用而常寂。故云寂。此約應化。然此涅槃有其多義。或云一種。謂大般涅槃。或有其二。謂性淨。方便淨。或有三種。謂性淨。圓淨。方便淨。又有三種。一性淨。二方便淨。三應化。或說有四。卽前四滅。此上諸義。總曰涅槃。若依唯識論等通說。涅槃有其四種。一自性清淨涅槃。謂真如之性。無

始時來。本自清淨。雖有客塵。而不能染。故曰性淨。在有情身。卽名佛性。在無情界。卽名法性。以本性清淨。故以為名。二有餘依涅槃。謂諸聖人。斷盡煩惱。止有餘殘苦。依身在由證。無為煩惱障。盡離諸翳動。寂靜安樂。故號涅槃。唯識論云。謂卽真如出煩惱障。雖有微細苦。依未盡。而障永寂。故名涅槃。三無餘依涅槃。謂諸聖人。厭苦欣寂。灰身滅智。餘迹既泯。故名涅槃。唯識論云。謂卽真如出生死苦。煩惱既盡。餘依亦滅。二障永寂。故號涅槃。四無住處涅槃。謂卽真如出所知障。大悲般若。常相輔翼。

由斯不住生死涅槃利樂有情窮未來際用而常
 寂故名涅槃。初一通凡及聖。次二通三乘。後一局
 大乘。廣如諸論所說也。後明示般於中。先解般字。
 後明示現。今初言般者。名入涅槃。經疏解入義有
 三。一就真以論息妄歸真。從因趣果。故名爲入。此
 解通因果。二據化辯入示滅。有因現亡身智。名之
 爲入。三就真應相對以辯入息化歸真。故名爲入。
 此解在果也。言示現等者。問諸佛何故示現入於
 涅槃。耶答。如大經離世間品云。作佛事已。觀十種
 義。示般涅槃。所謂示一切行實無常。故示一切有

非安隱。故示大涅槃。是安隱處。無怖畏。故以諸人
 天樂著色身爲現色。是無常法。令其願住淨身故。
 示無常力不可轉。故示一切有爲不隨心住不自
 在。故示一切三有皆如幻化不堅牢。故示涅槃性
 究竟堅牢不可壞。故示一切法無起而有聚集散
 壞相。故佛子。諸佛世尊作佛事已。所願滿已。轉法
 輪已。應化度者皆化度已。有諸菩薩應受尊號。咸
 記別已。法應如是入於不變大般涅槃。言善知識
 者。離世間品中。明十種善知識。經言佛子。菩薩摩
 訶薩有十種善知識。何等爲十。所謂令住菩提心

善知識。令生善根。善知識。令行諸波羅密。善知識。令解脫一切法。善知識。令成熟一切眾生。善知識。令得決定辯才。善知識。令不著一切世間。善知識。令於一切劫修行無厭倦。善知識。令安住普賢行。善知識。令入一切佛智所入善知識等也。言我悉勸請等者。如涅槃經說。我佛世尊臨涅槃時。以佛神力出大音聲。隨其類音徧告一切。今日如來應正徧知憐愍眾生。覆護眾生。等視眾生。如羅睺羅。為作歸依屋舍室宅。大覺世尊將欲涅槃。一切眾生若有疑者。今悉可問。為最後問。爾時世尊於晨

朝時。從其面門放種種光。其光雜色徧照大千佛之世界。乃至十方。其中眾生遇斯光者。罪垢煩惱一切消除。是諸眾生見聞是已。心大憂愁。同時舉聲。悲啼號哭。嗚呼慈父痛哉苦哉。舉手拍頭。捶胸叫喚。涕泣哽咽。大地山海皆悉震動。時諸眾生共相謂言。且各裁抑。莫大愁苦。當即往詣拘尸那城。力士生地。到如來所。頭面禮敬。勸請如來莫般涅槃。住世一劫。若減一劫。互相執手。復作是言。世間空虛。眾生福盡。不善諸業增長。出生仁等。今當速往。速往。如來不久必入涅槃。是時便有四十八眾。

各齋供具來詣雙林。時娑羅樹間吉祥福地縱廣
 三十二由旬。大眾充滿無空缺處。作大供養佛皆
 不受。五色口光出已復沒。天人大眾見地大動。又
 見光沒身毛皆豎。同聲哀泣說偈勸請稽首禮調
 御。我等今勸請遠離於大僊。故無有救護。今見佛
 涅槃。我等沒苦海。愁憂懷悲惱。猶如喪失母。貧窮
 無救護。猶如困病人。無醫隨自心。食所不應食。眾
 生煩惱病。常為諸見害。遠離法醫師。服食邪毒藥。
 是故佛世尊。不應見捨離。如國無君主。人民皆饑
 餓。我等亦如是。失陰及法味。今聞佛涅槃。我等心

迷亂。如彼大地動。迷失於法力。大僊入涅槃。佛日
 墜於地。法水悉枯涸。我等定當死。如來般涅槃。眾
 生極苦惱。譬如長者子。新喪於父母。如來入涅槃。
 如其不還者。我等及眾生。悉無有救護。如來入涅
 槃。乃至諸眾生。一切皆愁怖。苦惱集其心。我等於
 今者。云何不愁惱。如來見放捨。猶如棄涕唾。譬如
 日初出。光明甚暉。焰既能還。自照亦滅。一切暗。如
 來神通光。能除我苦惱。處在大眾中。譬如須彌山。
 復以種種譬喻。殷勤勸請佛。亦安慰而為說法。法
 應如是也。問諸佛菩薩。利物為心。住世益多。故須

勸請聲聞緣覺不能利他自求涅槃何須勸請答
 親斷煩惱證生空如住持佛法利益彌廣且聲聞
 益物者如空生鷲子處處請問大乘思勝滿慈所
 在激揚妙理飲光及與慶喜結集三藏遺文實頭
 盧等應真住持能多利物既有斯勝益故須請也
 又緣覺利物者出無佛世以神通攝生供養者現
 世他身獲果無盡且如善住天子昔曾供養辟支
 佛得生忉利天宮因感空聲來報由斯得免七返
 惡道之身又金色王十二年大旱國人罄盡糧儲
 因供養緣覺一食現世滿殊常之願皆能利物盡

有益生功德尤多故須勸請也問二乘聖者斷惑
 證如益物功高故須勸請諸善知識復是何人有
 何功能亦令勸請答如涅槃經德王品說善知識
 者謂佛辟支佛聲聞人中信方等者何故名爲善
 知識耶善知識者能教眾生遠離十惡修行十善
 以是義故名善知識又復如法而說如說而行自
 遠十惡亦令他離自行菩提亦令他行名善知識
 又自行施戒聞慧亦令他行名善知識又不能自
 樂常爲眾生不認他短常說善事名善知識如大
 船師善渡人故諸佛菩薩亦復如是度盡眾生出

生死海。名善知識。故須勸請問。諸佛如來法爾常
 現無盡身雲。徧說徧益。卽佛本住世。云何更言請
 佛住世耶。答然佛出世及般涅槃相對辨者有其
 二意。一約實義。二約對機實義。有三。謂圓宗中三
 諦釋也。一緣性卽空之眞諦。則非出非般。故大品
 偈云。如來不出世。亦無有涅槃。二法界緣起之俗
 諦。則念念處處而出現。念念處處而入滅。出現品
 成正覺章中云。佛子。應知自心念念常有佛。成正
 覺。何以故。諸佛如來不離此心。成正覺。故如自心
 一切眾生心亦復如是。悉有如來成等正覺。又云

得一切智大悲相續救度眾生。卽念念出現也。又
 云。當知無有少許處空無佛身。何以故。如來成正
 覺。無處不至。故卽處處出現也。入滅者卽上徧一
 切處出現之佛身。約隨相有爲義。邊念念卽生卽
 滅。四相同時。今謂以生卽滅爲念念處處而入涅
 槃也。三約法界實體。第一義諦卽常住世。或常涅
 槃寂而常照爲住世。照而常寂爲涅槃也。二約對
 機者。機緣感則菩提樹下而出現。機緣盡則雙林
 樹間而入滅。故出現品涅槃章中云。佛子。諸佛如
 來爲令眾生欣樂。故出現於世。欲令眾生生戀

慕故示現涅槃今既要菩薩行願勸請令住世。即
 當第二對機門也。佛本常住而云請住世者。眾生
 心垢業惡不見如來。設有心開解發。曾得見佛。而
 情識昧習氣勿起。遠不現前。故今勸請者。但依智
 離識。常作佛觀。心清智明。即常見佛。不會涅槃。若
 暫爾起心塵勞。相續觀智間斷。即不見佛。名佛滅
 度也。故出現品涅槃章中云。如來常住清淨法界。
 隨眾生心。示現涅槃。佛子。譬如日出。普現世間。於
 一切淨水器中。影無不現。或一處器破。則不現影。
 佛子。於汝意云。何彼影不現。為日咎否。答云。不也。

但由器壞。非日有咎。佛子。如來智日。亦復如是。普
 現法界。無前無後。一切眾生淨水器中。佛無不現。
 水器常淨。常見佛身。若心濁器破。則不得見。釋曰。
 法身無像。故無器而不形。聖智無心。故無感而不
 應。像非我有。自彼器之虧盈。心非我生。豈普現之
 前後。持戒器破。定水無依。菩提器破。智水寧止。無
 信清珠。故心水渾濁。何由見佛。又解緣起章中。明
 佛出世間門中云。非是佛身潛隱。而不出現。或無
 智者。則云。佛不出世。當知未會有世間。而佛不現
 者。此現與不現。由有智與無智。非佛行藏。而有出

沒但常照一眞法界則一切諸佛常現在前故知
請佛當淨其心也即同維摩經欲得淨土當淨其
心又心淨即佛土淨云

△疏標從勝說但請如來釋從通意三乘皆請

△疏三總結無盡

經如是虛空界盡眾生界盡眾生業盡眾生煩惱盡
我此勸請無有窮盡念念相續無有間斷身語意業
無有疲厭

△疏第八常隨佛學者此下三段皆是回向前一即
回向中別義

鈔三段皆回向者如前徵列名數中已明開合

△疏故下偈中第七行竟便標回向欲收此二屬回
向故若別說者即是所修二利行體亦是別說所
回向善根

鈔二利行體者常隨佛學自利愜順眾生利他也
別說所回向善根者即第十門將此二利功德及一
切福回向三處也

△疏文三一牒名

經復次善男子言常隨佛學者

△疏義同等一切佛回向亦自利行

鈔常隨佛學者謂托佛從因至果所歷之行所為
 之事以為所緣之境引得心智隨而學之謂以觀
 智融己身心令常在如此之境勿執身心定相致
 令在慳貪瞋恚六塵五欲顛倒境也若令佛所歷
 苦行境常為自己心觀者則遇諸苦事乃稱本願
 而無怨惱遇諸樂事自無就染以非常時心觀之
 所願故智者善思勉旃而學疏義同等一切佛回
 向者十回向中第三回向也此亦回向中別義故
 指同也第七等隨順一切眾生回向即當下第九
 恆順眾生也

△疏二釋相二一學本師二一明所學二一明因行
 經如此娑婆世界毘盧遮那如來從初發心精進不
 退以不可說不可說身命而為布施剝皮為紙析骨
 為筆刺血為墨書寫經典積如須彌為重法故不惜
 身命何況王位城邑聚落宮殿園林一切所有及餘
 種種難行苦行

鈔娑婆世界毘盧等者雖華藏世界正是十身之
 依報而娑婆界不相離即最中香水海二十重中
 第十三重是此娑婆也意明即此穢土眾生可以
 造觀修習又佛本不離穢土修證故略舉娑婆而

所歸之佛便須稱實。圓見故佛舉光明徧照。卽依
 正中真應影略耳。言從初發心等者。發心者所謂
 發大菩提心也。瓔珞本業經云。具縛凡夫未識三
 寶善惡因果。未於佛法起一念信。乃至從此住佛
 菩提正教法中。發菩提心起一念信。爾時便名信
 相菩薩。瑜伽唯識要具大乘二種種性。本性住種
 性。習所成種性。方於五位漸次悟入。智度論中辯
 發心相云。若有人言。願我當來作佛。度脫一切眾
 生苦惱。是名發菩提心。發心住經云云。何爲菩薩
 發心住。此菩薩見佛世尊形貌端嚴。色相圓滿。人

所樂見。難可值遇。有大威德。或現神足。或聞記別
 或聽教誡。或見眾生處諸劇苦。或聞如來廣大佛
 智發菩提心。求一切智等。此發心相有其十種。一
 親近善友。二供養諸佛。三修習善根。四志求勝法
 五心常柔和。六遭苦能忍。七慈悲深厚。八深心平
 等。九愛樂大乘。十求佛智慧。以此十事皆是發心
 求大菩提之相也。又有十心。一者信心。以心淨爲
 義。然有四種。一信根本。謂樂念眞如法。故二者信
 佛有無量功德。常念親近供養恭敬。發起善根。願
 求一切智。故三者信法。有大利益。常念修行諸波

羅密行故四者信能正修行自利利他常樂觀
 近諸菩薩眾學如實行故二者進心謂成前信心
 令其堅固是故勇猛發勤精進遠離眾苦故云進
 心三者念心謂由精進力故正念現前所謂六念
 一念佛謂三身種智無邊功德二念法謂教理行
 果能利益故三念僧所謂菩薩理事和合四念戒
 謂諸菩薩三聚淨戒五念施財法無畏施眾生故
 六念天第一義天常樂我淨是名念天也四者慧
 心謂由不安分別開悟決擇唯識道理慧解現前
 正觀諸法故五者定心修正行也起信云修行者

止一切境界相隨順奢摩他義攝心定也六者戒
 心依地持論菩薩住三聚淨戒是名戒心也七者
 回向心菩薩所修善根回向大菩提果名回向心
 也八者說法心謂於惡世法欲滅時發心受持如
 來正法策勵修行廣為人說令法廣布普使人知
 名說法心也九者捨心於身命財及煩惱業普皆
 捨故名捨心也十者願心謂願求佛果大菩提故
 云願心也具足十心便入賢位名發心住也言精
 進不退者簡非懶惰懈怠謂勇捍無退名之為進
 萬行無雜自之為精此亦有三一被甲精進二善

法精進三利樂精進具如下明也又言不退者謂不退墮即不退轉也有其四種謂信位證行一信不退者十信第六名不退心不退於外道家故二位不退者十住第七名不退住不退二乘法故三證不退謂初地菩薩出過凡位證聖法故更不退轉名證不退不退於凡位故四行不退者第八地中得無生忍已必當作佛更不退轉一切法中行一切行不被相用之所動轉名行不退故云從初等也剝皮為紙等者有二一隨相釋二觀智釋且初或諸緣闕必要記持聖言故不惜身命剝皮析

骨或雖竹帛紙墨不少要須重法苦身以展誠敬之志所以如此也如集一切福德三昧經云昔過去久遠阿僧祇劫有一仙人名曰最勝住山林中見諸神仙常行慈心復作是念非但慈心能濟眾生唯集多聞滅眾生煩惱邪見能生正見念已便詣城邑聚落處處推求說法之師時有天魔來語仙人言我今有佛所說一偈汝今若能剝皮為紙刺血為墨析骨為筆書寫此偈當為汝說最勝仙人聞已念言我於無量百千劫中常以無事為他割截受苦無量都無利益我今當捨不堅之身易

得妙法歡喜踊躍即以利刀剝皮爲紙刺血爲墨
 析骨爲筆合掌向天請說佛偈時魔見已愁憂憔悴
 即便隱去仙人見已作如是言我今爲法不惜
 身命剝皮爲紙刺血爲墨析骨爲筆爲眾生故志
 誠不虛餘方世界有大慈悲能說法者當現我前
 作是語時東方去此三十二剎有佛國土名普無
 垢國中有佛號淨名王忽住其前放大光明照最
 勝身苦痛即除平復如故佛即廣說集一切福德
 三昧最勝聞法得無礙辯佛說法已還復不現最
 勝仙人得辯才已爲諸眾生廣說妙法令無量眾

生住三乘道經千歲後爾乃命終生淨名王佛普
 無垢國由敬法故今得成佛佛告淨威昔最勝者
 今我身是是以當知若有人能恭敬求法佛於其
 人不入涅槃法亦不滅雖在異土常面見佛得聞
 正法故云剝皮爲紙等也二觀智釋者謂觀察此
 身若皮若骨都無定實舉體全空無我我所雖目
 觀似有之相而乃如聚沫如泡如燄如芭蕉既無
 自體元同法界如是一一推徵三諦具足成空假
 中之三觀詮此義時生得此解契合圓機便是寫
 經經是詮表生解義不觀不推即心迷取相是無

經也。

△疏二辯果用。

經乃至樹下成大菩提示種種神通起種種變化現種種佛身處種種眾會或處一切諸大菩薩眾會道場或處聲聞及辟支佛眾會道場或處轉輪聖王小王眷屬眾會道場或處刹利及婆羅門長者居士眾會道場乃至或處天龍八部人非人等眾會道場處於如是種種眾會以圓滿音如大雷震隨其樂欲成熟眾生乃至示現入於涅槃

鈔明果用中示種種神通者或云神足或云神境

具足應云神境智作證通或云運身通謂身輕舉自在無壅故以為名或曰神足者陰陽不測謂之神足謂舉動即智能運身如是名神足通也言種種者或可總舉果中六通也謂此六種智境無壅故名為通故言種種也起種種變化者轉換舊質名變無而忽有名化此變之與化佛及菩薩皆能為之即十八變也言十八變者一者震動震動大地謂佛菩薩定自在力普能震動或動一房一院一寺一縣一州一國小千界中千界大千界乃至無數世界皆令東湧西沒等也二者熾然盛謂身

相明顯也。由佛菩薩定自在力。於自身上出其猛
 燄。舉身洞然出種種光。青黃赤白等如底沙。如來
 入火光定名熾也。三者流布。佛與菩薩定自在力。
 令教法施行也。如法華經中普賢菩薩言。我當以
 神通力守護是經。於閻浮提廣宣流布。令無斷絕。
 卽然燈之義也。四者示現變異類形。相依定自
 在力。示現種種身化一切眾生也。五者轉變變謂
 大小不定。由佛菩薩定自在力起勝解通變身大
 小不定。或變大地為黃金。攬長河為酥酪。變磚瓦
 為金玉。變草木為飲食。變一切物皆令隨心轉於

舊質也。六者往來變或去或來。山河石壁無有滯
 礙。上至梵天。旁互十方皆隨心便至。如普賢從寶
 威德上王佛國來於此土也。七者卷。由佛菩薩定
 自在力。令須彌山入芥子中。無量世界在一塵內。
 等八者舒展。小令大。令一塵一毛皆徧法界也。九
 者眾像入身。身內包容一切形像。如摩耶夫人含
 容無邊世界。大菩薩眾集會聽法。又普賢身內佛
 佛無盡。佛毛孔內菩薩重重也。十者往同類趣。由
 定自在力。能現身於六道受生。同其形類。以彼言
 音說法教化。十一隱。是從有現無。謂佛菩薩定自

在力於大眾前忽然不現如文殊師利於靈山會上答彌勒了大眾不見早已隱身到於龍宮十二顯是從無現有。如靈山會上從地湧出無量菩薩一一菩薩百福嚴相十三所作自在。即無有壅滯也由定自在力於一切世界行住坐臥所作所為隨自意樂利益自在。十四制他神通謂佛菩薩定自在力能制一切邪通也。十五能施辯才謂有志心於佛及菩薩求聰慧者悉能施與。如利涉和尙求觀音菩薩乞無礙辯得過人辯十六能施憶念令知過去事謂佛菩薩加被有情令自憶過去久

遠劫事悉得也十七能施安樂名所化離苦佛及菩薩大慈悲力拔苦與樂也十八放大光明或放光明照一切世界如經言照東方萬八千世界乃至徧照十方無數世界皆得也謂佛變化有此十八種故所以言起種種變化也現種種佛身者謂即兩重十身融三世間十身中有眾生身國土身業報身聲聞身緣覺身菩薩身如來身法身智身虛空身即善財所遇諸善知識皆不離佛身故云種種又統論佛身有其多種或說一身即一法界身或說二身謂真身亦名法界身二應身亦名生

身或說三身謂法報化身或說四身開報爲二一
 自受用身二他受用身或說五身一堅固自性身
 二福德莊嚴聚身三受用智慧身四作變化身五
 淨法界身或說十身如前所明乃至法界無盡身
 雲若束而言之不過體相用三體卽法身相卽報
 身用卽化身佛身功德雖有無量攝之不出於三
 身今言種種者卽可知也或處轉輪聖王等者轉
 輪聖王人中第一千子圍繞七寶隨身統攝四洲
 大弘十善相圓百福足蹈千輪言七寶者一輪寶
 二珠寶三女寶四馬寶五象寶六主藏臣寶七主

兵臣寶淨名經云王有千子端正勇健能伏怨敵
 也餘有銀輪銅輪鐵輪等名爲小王如菩薩瓔珞
 本業說銀輪五百輻王三洲銅輪一百輻王二洲
 鐵輪五十輻唯王南洲法華經說名小轉輪王也
 又諸刹利非輪王者大粟散等皆名小王或作彼
 王處於眾會化彼眷屬或現諸身在彼眾中說法
 教化故云處等也或處刹利婆羅門等者此舉四
 種族姓也西域記云若夫族姓殊者有四流焉一
 曰婆羅門淨行也守道居貞潔白其操二曰刹帝
 利王種也舊云刹利略也後人訛也奕世君臨仁

怨為志三日吠奢舊云毘舍訛也商賈也貨遷有
 無逐利遠近四曰成陀羅農人也舊云首陀訛也
 肆力疇墾勤身稼穡凡茲四姓清濁殊流婚娶通
 親飛伏異路內外宗枝姻媾不雜婦人一嫂終無
 再醮自餘雜姓實繁種族各隨類聚難以詳載君
 王奕世唯刹帝利餘文可知乃至示現入於涅槃
 者後明歸真益物也如我佛涅槃時以佛神力出
 聲普告今日如來欲入涅槃若有疑者今悉可問
 為最後問即於晨朝面門放於種種色光普照世
 界遇斯光者罪垢消滅有聞聲者舉聲悲哀嗚呼

慈父苦哉痛哉舉手拍頭搥胸號喚大地山河皆
 悉震動天人大眾皆來集會娑羅林間禮佛悶絕
 徧體血現如波羅奢花爾時世尊出入種聲普告
 大眾莫大號哭猶如嬰兒各相裁抑勿自亂心即
 為說法我今於此顯難思議現方便力入大涅槃
 示同世法欲令眾生知身如電生戀慕善生死瀑
 河漂流速疾諸行輪轉法應如是汝等當知此大
 涅槃乃是諸佛金剛寶藏常樂我淨周圓無缺諸
 佛於此而般涅槃最後究竟理極無遺諸佛於此
 放捨身命故名涅槃如是為說略教誠已告語阿

難說茶毘法已以金手卻偈伽梨顯出紫磨黃金
師子之臆上昇虛空七多羅樹二十四返告諸大
眾我欲涅槃汝等深心看我金剛堅固不壞紫磨
黃金無畏色身如優曇華難可值遇大眾應當深
心瞻仰我涅槃後應疾修行早出三有勿復懈怠
散心放逸說是語已出入諸禪三返示誨已於七
寶牀右脅而臥頭北足南面西背東即於中夜入
第四禪寂然無聲入於涅槃佛涅槃已時娑羅雙
樹東西二雙合爲一樹南北二雙亦合爲一樹垂
覆寶牀蓋如來身自然變白枝莖皮幹自然爆裂

摧折無餘是時大地諸山悉皆崩裂大海湧沸江
河枯竭日月無光黑風鼓怒吹扇砂塵諸樹草木
摧碎墮地皆各有聲歎佛入滅世無依怙諸天哀
慟震大千界哀哉哀哉奈何奈何何期今日人天
之師爲事究竟無能留者於是阿難悶絕邊逗慰
喻水灑乃蘇人天悶絕皆大號哭不能自制各各
相抑互相勸喻然後各辦廣大供養依法茶毘如
轉輪王法干氈纏身灌諸香油多積香木然後以
火焚而燒之收拾遺形起塔安置等廣如經說

△疏二辯能學

經如是一切我皆隨學。

△疏二例一切。

經如今世尊毘盧遮那如是盡法界虛空界十方三世一切佛刹所有塵中一切如來皆亦如是於念念中我皆隨學。

△疏三總結無盡。

經如是虛空界盡眾生界盡眾生業盡眾生煩惱盡我此隨學無有窮盡念念相續無有間斷身語意業無有疲厭。

大方廣佛華嚴經普賢行願品別行疏鈔卷第十